



Tusagassiuutitigut nalunaarut

Qaortoq 17. oktober 2017

2018-mi mittarfissap sanaartorneqalernerani nivariaqqaarnissaq Kujataani politikerit qilanaarivaat

Nutaamik illoqarfinnullu qanittumiittumik mittarfittaarnissamik kissaateqarneq ukiut 25-it sinnerlugit matuma siorna aallartippoq, tassa 1980-ikkut naajartorneranili kissaat tamaviaarutigineqalermoq, taamaattumik ilumoortumik oqartoqarsinnaavoq kujataamiut utaqqisinnaassuseqarluartuusut. Maannakkut, ukiut taamak amerlatigisut qaangiutereerneranni kissaat taanna kiisami piviusunngortussanngorpoq, innuttaasullu qilanaarput 1500 meterimik mittarfiliornissap 2018-mi aallartinnissaanut. Mittarfiup naammassineqarsimalereeruni inuiaqatigiit kiffartuussinnaanngussavai aammalumi nunarsuarmioqativut Kujataanut tikeraartut nunniffigilluarterumaarpat.

- *Suliniut sivisoorujussuarmik ingerlanneqarnikuvoq, Kujataamiunullu assut nuannissaaq aappaagu nivariaqqaarneq piviusunngortinneqarpat, kommunalbestyrelsilu sinnerlugu assut iluarisimaarpara pisut aallartinnissaannut ukioq ataasiinnaanngormat, Kommune Kujallermi borgmesteri Kiista P. Isaksen (S) oqarpoq.*

Ullumikkut nunaminertaq mittarfeqarfinggorumaartussaq Kujataani qaqqaqarfittut allatulli isikkoqarpoq, taamaattorli aqqusineq nutaaq, takillunilu sillajaajusoq qaqqaqarfiit akornisigut Qaortumiit mittarfissap tungaanut sanaartorneqarsimalereerpoq, taannalu takussutissaavoq mittarfiliornissaq suliniutigalugu aallartinneqareersoq. 2021-mi takornarissat tikeraleruttorfii sioqqutilaarlugu mittarfik upernaakkut piareersimassaaq, taamaallutik takornarissat tikeraallu allat Kujataa Airport-imut missinnaanngussapput – Kujataa, illoqarfittai, nunaqarfittai savaateqarfittaalu takusarlugit, aammalu nunaminertat UNESCO-p nunarsuarmi kingornussassanut allattorsimaffianiittut ornillugit.

Mittarfittaarniarnermi siunertaavoq illoqarfinnut kommunip innuttaasa katersuuffigisaannut qanittumik qitiusumillu inissisimasumik Qaortup Narsallu akornanni mittarfeqalernissaq, taamatutaaq takornarissanut nunanit tamalaaneersunut Kujataanut kajungilersitsinissaq, kiisalu minnerunngitsumillu aalisakkat nutaat Kujataaniit avammut nioqutigisinnaalernissaat.

Suliffissanik amerlanerusunik pilersitsisoqassasoq upperaatt

Taamaammat Kommune Kujalliup tungaanut nivariaqqaarnissaq 2018-mi pisussaq qilanaarineqarpoq, pisussaq nalliuttorsiuutigineqassaaq, neriutiginerparlorlu nalliuttorsiuutiginninnermi peqataasoqarluarumaartoq. Borgmester Kiista P. Isaksen tassunga tunngatillugu oqarpoq:

- *Nuannaarutigaara oqallinnigut misigissutsinik annertuunik aallaavillit maanna qaangereerlugit ullumikkut suliniut katersuuffigilersimagatsigu. Isumaqarpunga mittarfittaarnitsigut inuussutissarsiutit ineriartortinneqarnerat annertusissasoq aammalu Kujataani suliffissat amerlanerit pilersinneqassasut. Qularutiginngilara Kommune Kujallermiittugut tamatta aammalumi minnerunngitsumik nunarput tamakkerlugu tamatta iluaqutissinneqassasugut; angallannikkut ilaasunik kiffartuussinissamut isumaqatigiissutit akisoqisut ilai peerneqarsinnaalissapput aammalu mittarfittaassap toqqaannarnerusumik silaannakkut angallassisoqalerneratigut nunatsinni inuussutissatigut immitsinnut pilersornerulernissatsinnik periarfissarissaartinnerulissavaatigut.*



1990 sioqqulluguli Qaqortumi mittarfiliortoqarnissaa oqallisigineqalerpoq, qularnanngitsumillu taamanili kissaatigineqarsimassaaq mittarfissaq naammassineqariikatassimassasoq. Taamatulli ingerlasoqanngilaq, taamaattorli qujanartumik pilersaaruserneq maanna ingerlarsulernikuuvoq, tamannalu Kalaallit Airports aammalu Naalaakersuisut aquppaat siunnerfigineqarluni ukioq 2020-mi ukiakkut mittarfik naammassineqarsimassasoq.

Kommune Kujalliup tungaanit mittarfissap 1500 meteriunissaanik pilersaarut siunissamut qularnaatsut nalilernikuuaa, taamatut naliliinermut pissutaavoq silaannakkut angallassiviutileqatigiit arlallit naqissusernikuummassuk mittarfik taamak takissusilik timmisartut nutaaliat miffigisinnaalluaraat aammalu Kalaallit Airports-ip tungaanit qulakkeerniarneqarmat kingusinnerusukkut pisariaqartitsineq naapertorlugu mittarfiup takissusaa 1799 meterinnngortinneqarsinnaajumaartoq.

- *Qilanaarpunga takussallugu kommunerput ukiut qulit qaangiuppata qanoq isikkoqarumaarnersoq, qularutiginnilaralu Kommune Kujalleq tamarmi mittarfittaarnermigut annertuumik iluaqutissineqarumaartoq. Narsaq mittarfissap ungasinnisaaniippoq, taamatuttaaq Nanortalimmut silaannakkut angalaneq pisariitsunnguussaaq sivikitsunnguullunilu. Isumaqarpunga Kujataa Kalaallit Nunatsinni takornarissanut tikikkuminarnerpaajusoq, ornikkuminartuullunilu takusassarsiorfissanut misigisassarsiorfissanullu qanittunnguugami, aammalu mittarfik nutaaq qitiusumik inissisimasoq ineriartortoqarnissaanut periarfissarissaartitsilluussaaq, Kiista P. Isaksen (S) oqarpoq.*

Kommune Kujallermut pingaaruteqarpoq

Taamatuttaaq Stine Egede (IA), isumaqarpoq mittarfissaq Kujallermut assut pingaaruteqassasoq.

- *Mittarfik 1500 meterinik takissusilik angallannermik nutaamik annertuumik pilersitseqataassaaq, ilaatigut takornarissat ullumikkut takkuttartunit allaanerusut illoqarfimmu qanittumik mittarfimmu tikikkusuttartut tikittalissapput, tamatumalu malitsigisaanik Kommune Kujallermi takornarialerisarnerup nutaamik ineriartortitsisinnaanissaanut periarfissaqalissaaq. Pingaartumik assersuutigiinnarlugu Island aamma Canada eqqarsaatigalugit periarfissaalertussat assut pissanganarput, matumani eqqarsaatigalugu Keflavik-imut aammalu St. John's-imut takornarissat eqqarsaatigalugit attaveqaateqalernissaaq tamannami aamma timmisartuutileqatigiiffiit uagutsinnut eqqumaffigeqqullugu saaffiginnissutigisareermassuk. Stine Egede oqarpoq nangillunilu:*
- *Taamatut inissisimalernerup inuussutissarsiutitigut ineriartortitsiniarnerput nutaamik periarfissineqassaaq, suliffissat nutaat pilersineqassapput aammalu uagutsinnut najugaqavissuusunut taamaalilluni inuuniarnitsinnut oqinnerulersitsissaaq. Mittarfiup avataanut attavilunnerput kipitissavaa aammalu kommunitisinnit sumiiffnnut allanut nuuttartut ikinerulersissavai, aap allaammi neriulersineqassaagut nunap immikkoortuanut najukkatsinnut nuukkumanerulertoqassasoq. Isumaqarpunga Kalaallit Nunatta Kujataani assigiinnngitsutigut pitsaassutsimik peqarnerput pissutigalugu; savaateqarfiit, sikorsuit, sermersuaq, qallunaatsiaat nunatsinniissimanerannut takussutissat aammalu narsaamanertavut naggorissut, tamakku mittarfiup atuutilersinneqarneratigut inerisaanissatsinni atorluagassassaapput, taamaalilluni angallanneq takorluukkanit annertunerulersineqassaaq. Pissutsit taamaalinerat tamatta iluaqutissarsiffigissavarput, Narsaq Nanortalillu aamma ilanngullugit, Stine Egede naggasiilluni oqarpoq.*

Ataatsimut tamakkiisumillu isiginnilluni Kommune Kujallermi kommunalbestyrelsimi ilaasortat ataatsimoorlutik pilersaarummut kommune sutigut tapertaasinnaanersoq nalilersorpaat, sanaartornerup nalaa aammalu sanaartoreernermi ingerlatsinerup nalaa eqqarsaatigalugit. Tassa Kommune Kujalleq tamarmi, politikikkut aammalu allaffissornikkut ingerlatsinermini Kalaallit Airports-imik aammalu Naalakkersuisunik sukumiinerusumik suleqateqarnissaminut piareersimalluarpoq.